

Kejayaan Malaysia Sebagai Negara Berbilang Kaum, Agama Juga Bantu Duduki Kerusi UNSC - Najib

Bernama

Oct 19, 2014

SHAH ALAM, 19 Okt (Bernama) -- Perdana Menteri Datuk Seri Najib Tun Razak pada Ahad berkata kejayaan Malaysia menduduki kerusi anggota tidak tetap Majlis Keselamatan Pertubuhan Bangsa Bersatu (UNSC) juga disebabkan kejayaannya sebagai sebuah negara berbilang kaum dan agama.

"Kita boleh tunjuk pada dunia dengan cara merendah diri, melalui konsep kesederhanaan dan kompromi dalam politik (yang diamalkan di Malaysia)," katanya ketika merasmikan Persidangan Perwakilan Nasional Parti Gerakan ke-43 di Pusat Konvensyen Setia City di sini.

Najib berkata Barisan Nasional (BN) menolak sebarang bentuk ekstremisme dalam usaha memajukan negara berlandaskan asas yang ditinggalkan pemimpin terdahulu.

Pemimpin terdahulu telah menggubal Perlembagaan negara berasaskan kompromi politik dan mereka mempercayai integrasi nasional dan bukan asimilasi bangsa, katanya.

"Kita mempunyai Bahasa Melayu sebagai bahasa kebangsaan tetapi bahasa lain juga boleh diamalkan di negara ini dan kita juga ada agama Islam sebagai agama rasmi tetapi agama lain boleh diamalkan tanpa sekatan," katanya.

Turut hadir Presiden Gerakan Datuk Mah Siew Keong, Presiden MCA Datuk Seri Liow Tiong Lai, Presiden MIC Datuk Seri G. Palanivel, Presiden Parti Progresif Penduduk (PPP) Tan Sri M. Kayveas dan bekas Presiden Gerakan Tan Sri Dr Koh Tsu Koon.

Menyentuh mengenai Gerakan, Najib yang juga Pengerusi Barisan Nasional (BN) berkata beliau melihat kemenangan di pilihan raya kecil (PRK) Parlimen Teluk Intan pada Mei lepas sebagai titik tolak kepada kebangkitan parti itu.

Beliau turut memuji kesanggupan dan keberanian Mah mengambil risiko dengan menjadi calon BN pada PRK itu menentang calon muda DAP Dyana Sofya Mohd Daud.

"Bila kekosongan berlaku di kawasan Teluk Intan, ramai yang meramalkan tidak mungkin BN boleh memulihkan keadaan daripada defisit sebanyak 7,313 (undi), mungkin pada ketika itu ramai yang anggap itu sebagai satu misi sukar untuk BN menang dan sekiranya Mah bertanding ia satu tindakan bunuh diri untuk beliau.

"Saya berbangga dan saya mengagumi beliau. Dalam kata lain, dia sanggup meletakkan kedudukannya sebagai Presiden Gerakan dalam risiko, maknanya kalau dia kalah tak mungkin dia dapat dari segi moralnya terus mempertahankan kedudukan sebagai presiden. Itu adalah risiko yang Mah sanggup ambil dan beliau telah melakukan suatu

pengorbanan politik," katanya.

Pada PRK Teluk Intan 31 Mei lalu, Mah yang juga Menteri di Jabatan Perdana Menteri menewaskan Dyana Sofya dengan majoriti 238 undi. Mah memperoleh 20,157 undi manakala Dyana Sofya mendapat 19,919 undi.

Perdana Menteri juga secara berseloroh menyentuh mengenai kerjasama di antara Gerakan dan MCA yang disifatkan lebih baik terutama ketika PRK Teluk Intan.

"Gerakan perlu bekerjasama dengan MCA, kita perlu bersatupadu sebagai sebuah keluarga. Kita mesti menyokong di antara satu sama lain di Teluk Intan di mana MCA dan Gerakan bekerjasama dengan amat baik dan Umno, MIC serta PPP juga bekerjasama erat.

"Saya yakin kalau semangat BN ini dapat kita amalkan maka Parti Gerakan akan terus kekal relevan dalam konteks Malaysia," katanya.

Najib dalam pada itu mengingatkan pemimpin semua parti komponen BN supaya mengamalkan dasar kesederhanaan dan keseimbangan bagi memastikan rakyat kekal menyokong parti itu pada pilihan raya umum akan datang.

Beliau berkata dalam proses demokrasi yang diamalkan di negara ini, kuasa mutlak untuk memilih pemimpin terletak di tangan rakyat dan mereka terdedah kepada banyak maklumat yang tidak tepat di Internet.

"Rakyat hari ini mempunyai maklumat lebih dan kadang-kadang terlalu banyak. Mereka dihasut (oleh pembangkang) dalam Internet di mana bukan semua maklumat tepat dan banyak pembohongan.

"Bayangkan ketika PRU ke-13 tahun lepas, undi kaum Cina menurun kerana pembangkang mendakwa BN bawa masuk 40,000 pengundi dari Bangladesh dan ramai yang mempercayai perkara itu. Ini masalahnya, justeru kita mesti didik rakyat supaya berfikir dengan lebih rasional," katanya.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1077984>